

Script of Morning Gojri News Bulletin 06 April 2025 at 1015Hrs

مارننگ گو جری نیوز بلیٹن مورخہ 06 اپریل 2025

یوہ آکا شوانی جموں ہے محمد امین انجم تیں خبر سُنو۔

HM JK Visit

وزیر داخلہ امت شاہ غو اج جموں کشمیر غا دورہ غو نقشہ کار ہے۔ دورہ غو مقصد سلامتی صورتحال غو جائزو، نالے حفاظتی جواناں نال گل بات کرنی ہے۔ اپنا 3 روزہ جموں کشمیر دورہ غے دوران مرکزی وزیر داخلہ امت شاہ جموں مانہ بی جے پی غا قانون ساز ممبراں نال میٹنگ کرن غے نال نال یونیٹائیڈ ہیڈ کوارٹرز اور سالانہ شری امرناتھیا ترا غا سلسلہ مانہ الگ الگ 2 اہم میٹنگاں غی صدارت کریں گا۔ وزیر داخلہ جموں کشمیر غا لوکاں نانہ ور چول تقریب غے دوران کروڑاں روپیاں غا کنیں پروجیکٹ وقف کریں گا، نالے پروجیکٹاں غو نی پتھر رکھیں گا۔

Prez Waqf

صدر جمہوریہ درویدی مرمو نے وقف ترمیمی بل 2025 نانہ منظوری دے دی ہے۔ یوہ بل پچھلے ہفتے پارلیمنٹ مانہ پاس ہو گئی تھی۔ صدر غی منظوری تیں بعد ہون یوہ بل قانون بن گئی ہے۔ اس سلسلہ مانہ ویرواریں لوک سبھا مانہ قانون سازی پاس ہو گئی تھی۔ اس ضمن مانہ 288 ممبراں نے بل غا حق مانہ جد کہ 235 ممبراں نے بل غے خلاف ووٹ دتا تھا۔ اسے طرح مذکورہ بل راجیہ سبھا مانہ وی پاس ہو گئی، جت 128 ممبراں نے وقف ترمیمی بل 2025 غی حمایت کی، جد کہ راجیہ سبھا مانہ 95 ممبراں نے بل غی مخالفت کی تھی۔

Special Programe

آکاشوانی جموں غا علاقائی خبراں غا شعبہ غی طرفوں اج یعنی 6 اپریل نانہ وقف ترمیمی بل 2025 غا سلسلہ مانہ اک 25 منٹ غو تبادلہ خیال پروگرام چلے گا۔ یوہ پروگرام اج سویرے پونے 11 بجے شروع وے گا۔ جس مانہ سینئر صحافی تے جموں کشمیر وقف بورڈ غا ممبر سوبیل قاضی تے ریٹائرڈ جج اور جموں کشمیر پبلک سروس کمیشن جے کے پی ایس ایل غا سابق ممبر سبھاش گپتا مہارا مہمان وین گا۔ اس ضمن مانہ اسے طرح غی

ہو ر جانکا ری حاصل کرن غی خاطر آکاشوانی جموں غای خبر میڈیم ویو 330 میٹر یعنی 990 کلو ہرٹز، 100.3 میگا ہرٹز اور ڈی آر ایم 981 کلو ہرٹز ور سُنتا رہیو۔

SC Collegim

سُپریم کورٹ نے کو لیجم نے جسٹس ارون پلّی نانہہ جموں کشمیر تے لداخ ہائی کورٹ غا نواں چیف جسٹس بنان واسطے تقرری سفارش کی ہے۔ ویں اس ویلے پنجاب تے ہریانہ ہائی کورٹ غا اک جج ایں۔ یوہ فیصلو چیف جسٹس تاشی ریستان غی سبکدوشی غے مد نظر آیو ہے۔ 1964 مانہہ پیدا ہوا جسٹس پلّی قانونی پیشہ واراں گا نمایاں کنہہ تیں آویں۔ قابل ذکر ہے جے جسٹس ارون پلّی مئی 2023 تیں ہریانہ سٹیٹ قانونی خدمات اتھارٹی غا اکزکیٹو چیئرمین غے طور کم کر تا آریا ایں۔

Ram Navmi

مُلک غا بکھ بکھ حصاں غے نال نال جموں کشمیر مانہہ وی رام نومی مذہبی جوش نال منائی جا رہی ہے۔ یوہ تہوار بھگوان رام غا جنم تہاڑا غی علامت ہے۔ لیفٹنٹ گورنر منوج سنہا تے وزیر اعلیٰ عمر عبداللہ نے رام نومی غا موقع ور لوکاں نانہہ مبارکباد پیش کی ہے۔ اپنا اک پیغام مانہہ لیفٹنٹ گورنر نے شری رام نانہہ انصاف غی اک علامت غے طور اُجاگر کیو۔ اُنہاں نے تمام واسطے امن اور ترقی غی دُعا کی ہے۔ وزیر اعلیٰ نے بھگوان رام غی انسانیت واسطے قدراں ور زور پایو تے اس تہوار نانہہ خود خدمت واسطے اپنو ارادو پکو کرن غو اک موقعو قرار دتو۔ وزیر سکینہ اتو تے کا بینہ غا دوجا ممبراں نے وی اس سلسلہ مانہہ مبارکباد دتی ہے۔

Rana Irrigation

جل شکتی غا وزیر جاوید احمد رانا نے ذرعی سرگرمیاں واسطے حمایت بدھان غی خاطر ویلے سر آبپاشی پروجیکٹ مکمل کرن غی ضرورت ور زور پایو۔ آبپاشی تے سیلاب کنٹرول محکمہ غی اک جائزہ میٹنگ غی صدارت کرتاں واں وزیر موصوف نے ذرعی بہبود واسطے موثر آبپاشی انتظام غی اہمیت اُجاگر کی، بشمول سیلاب انتظام، تے سرحدی علاقہ بارے پروجرام نبارڈ غا پیسہ نال جُڑیا پروجیکٹاں تے یوٹی کپیکس اور چل رہیا تمام پروجیکٹاں غی ویلے سر عمل آوری غی ہدایت کرن، موصوف نے کلیدی اسکیمیں غی پیش رفت غو جانزولیو۔

Community Radio Udhampur

اُدھم پور ضلع واسطے اک تاریخی قدم مانہہ ڈپٹی کمشنر سالونی رائے نے ڈی آئی جی رائیس محمد بھٹ غے ہمراہ کمیونٹی ریڈیو اسٹیشن اُدھم پور غو افتتاح کیو۔ 89 عشاریہ 2 ایف ایم دل کی آواز ریڈیو اسٹیشن غو افتتاح آرمی پبلک اسکول ٹی موڑ مانہہ کیو گیو۔ اس ریڈیو اسٹیشن غو مقصد مقامی ورثو منانو، لوکاں غی آواز پُجانی اور تعلیم، تفریح تے متحرک کرن آلی کہانیاں سانجھی کر غے شہر یاں نانہہ با اختیار بنانو ہے۔

IPL Cricket

آئی پی ایل کرکٹ غا سلسلہ مانہہ راجستھان رائلز نے پنجاب کینگز نانہہ 50 دوڑاں نال ہرا دتو۔ اس ضمن مانہہ گئی رات چندی گڑھ مانہہ اک بین القوامی کرکٹ اسٹیڈیم مانہہ مقابلو ہوو۔ پہلاں بلے بازی کرتاں واں راجستھان رائلز نے مقررہ 20 اوراں مانہہ 4 وکٹاں غا نقصان ور کُل 205 دوڑ بنائیاں، جواب مانہہ پنجاب کینگز 9 وکٹاں غا نقصان ور 155 دوڑ ہی بنا پائی۔ راجستھان رائلز غی طرفوں جسسونی جیسوال نے 45 گینداں مانہہ 67 جد کہ پنجاب کینگز ٹیم غی طرفوں نیہال وڈیرا نے 62 دوڑ بنائیاں۔ اک ہو ر مقابلہ مانہہ دہلی کیپٹل نے چنئی سُر کینگز نانہہ چنئی مانہہ 25 دوڑاں نال ہرا دتو۔ قابل ذکر ہے جے اج شام ساڈھے 7 بجے حیدر آباد غو گجرات ٹائٹن نال مقابلو وے گو۔ میچ حیدر آباد مانہہ کھیڈیو جائے گو۔
